

## **TAMPAI G-KRIS (Jaku Dalam 29:18)**

### **G-KRIS.**

Selamat taun baru. Taun tu kitai nyinkang ngagai era baru. Bulan 5, taun 2010 kitai ngaga pemutus runding ti beguna bendar, ianya kitai deka setapa sejari, sedada seati. Kitai deka betulong bebantu dalam pengawa gerija, begulai sejalai laban Kristen tanda pengerindu, lalu pengerindu nya meh ti mai nuan datai ditu lemai tu.

Taun tu, 48 taun kitai sebala udah dalam Malaysia. Ngelama tu bansa kitai bisi SDNU & SADIA. Saritu kitai bisi Gerempong Kristen Jaku Iban Bhd (G-KRIS) ti bepun ari kanggau Allah Taala ti deka meda kitai begempong nengah pengarap. Aku enggau ati gaga madahka kita G-KRIS udah dikemendarka perintah nyadi siti gerempong pengarap kenaka 30 Disember 2010, ianya siti kempeni ti nadai sher serta ukai ngulihka untong.

Jaku Tuhan udah nyata madahka ***“utai ti deka diketau amat mayuh, tang tuboh orang ti ngetau mimit” (Matt 9:37)***, lalu tu meh kabuah G-KRIS tu ada. Di dunya diatu, penyampau mensia ianya 6.9 billion iko lalu lebih kurang 2.3 billion (1/3) aja Kristen. Ari 2.3 billion iko, satengah ari Roman Katolik lalu satengah ari gerija bukai. Reti tu, umai kitai besai, nadai ulih intu dua-tiga bengkah gerija aja; kitai begunaka mayuh bengkah jalai nanam benih serta ngetau umai ti besai.

### **Mensia datai ba bulan.**

Dalam taun 50's, ideoloji komunis bekerembai di serata dunya – di Soviet Union, di China, datai ba Asia Tenggara nyentok ngagai pala tangga menoa Amerika ianya di Cuba. Situasi tu nyuruh President U.S.A. John F. Kennedy kenaka 25/5/1961, ianya 50 taun ti udah, meri chabar ke orang Amerika deka nganjong mensia ke bulan sebedau pengujung dekad 60's. Ko Kennedy *“I believe that this nation should commit itself to achieving the goal, before this decade is out, of landing a man on the moon and returning him safely to the Earth.”*

President Kennedy milih langit alai belaban enggau Soviets. Bala Kongres begempong, setuju meri USD9 billion begigaka teknologi ti ulih ngangkatka samangat orang Amerika. Sekeda orang Amerika enda arapka Amerika ulih ngenataika mensia ke bulan. Tang kenaka 20/7/1969, setaun sebedau pengujung timpoh, Apollo 11 komander Neil Armstrong ngengkahka kaki iya ba bulan.

### **“I Have A Dream”.**

Tiga taun udah President John F. Kennedy meri chabar ka orang Amerika deka nganjong mensia ngagai bulan, siko paderi Rev. Martin Luther King, Jr. kenaka

28/8/1963 bejaku pasal pengadang iya ka menoa Amerika. Aku mai kita ningaka jaku iya maya nya. (*Video- I Have A Dream*)

Maya tu kelia orang Negro di Amerika kena diskriminasi – sida dikemaroh, nyadi ulun, nadai hak ngundi. Taja meh dalam situasi ti penoh dalam penguji, Martin Luther King, Jr. madahka orang Negro iya bisi pengadang – bisi tampai meda menoa Amerika nadai bebelah bagi bansa, kulit putih & kulit chelum deka sama pangkat, orang Negro deka bisi hak diau di menoa diri empu lalu nadai agi nyadi ulun.

Pengeras pengawa Martin Luther King nadai lebu. Dua taun udah iya bejaku “I Have A Dream”, orang Negro bulih hak ngundi nengah Voting Rights Act, 1965. Lalu kenaka 20/1/2009, 46 taun udah Martin Luther King bejaku “I Have A Dream”, Barack Obama ngangkat sumpah nyadi presiden Amerika ke 44.

### **Bansa ti nadai tampai deka lenyau.**

Kitai sebala pen bisi pengadang. Kitai deka idup menyana - bisi ai irup ti chiru enggau beresi; kitai deka diau ba rumah ti bisi api karan; kitai deka bisi sepital ti dampih alai diau; kitai deka meda anak masuk university awakka landik macha enggau bekira; kitai deka diberi peluang bekerja lalu bulih gaji ti besai.

Enti kitai sebala deka idup lantang senang baka ti udah disemayaka ulih Allah Taala nengah nabi Jeremiah (**Jer 29:11-12**), kitai sebala mesti berani berubah, ngelengka adat lama, jalai lama ti nadai ngenyenangka kitai. Reti tu, enti dulu kelia kitai bumai betupi ngulih asil ti mit, diatu kitai patut bumai betupi ngena jalai ti baru ti ulih mai asil ti besai. Kitai diatu patut nyadi ofiser tauka menija, nyadi direkta tauka professor, nyadi orang dagang awakka nadai nyadi orang umang. Dikena kitai mansang, kitai mesti nemu penungga pengidup, kitai mesti nemu orang ti ulih enggau bepanggai. Kitai nadai ulih bepanggai ba orang segapa kada, kitai nadai ulih ngarapka wakil rayat aja. Kitai mesti berunding panjai, bepikir besai. Kitai mesti bisi tampai ti datai ari petara Allah Taala laban bansa ti nadai tampai deka lenyau. ***Jaku Dalam 29:18 “Menoa ti enda nitihka iring Allah Taala, nya menoa ti nadai ator. Orang ti ingat ka adat Allah Taala tau lantang.”***

### **Tampai.**

Jaku President John F. Kennedy ti mai Kongres Amerika nganjong rayat Amerika ke bulan, jaku Rev. Martin Luther King, Jr. “I Have A Dream” ti deka meda bansa Negro setanding enggau orang kulit putih mandangka kuasa tampai ke kitai.

Tampai ti terang nya siti penemu ti ngasoh ketua nyadi efektif. Tampai nempa jalai bekerja, meransang serta nyerakupka tim; tampai meri pengingin ati nuju destinasi. Tampai ngerintah penungga pejalai kitai. Ari tampai kitai nemu tuju,

enti kitai lubah nemu arah, laju nemu tuju. Tu meh reti tampai – destinasi ti deka dituju kitai.

Lebih 5,000 taun ti udah, Moses disuruh Tuhan mai bansa iya ngagai Kanan (**Psut 33:1-3**). Taja meh Moses enggau lebih sejuta orang Israel nadai ulih ngenataika diri di Kanan, tampai Allah Taala disambung ulih Josua enggau Kaleb.

Udah Moses mati, Allah Taala meri tampai ti terang ngagai Josua ***“Anembiak Aku Moses udah mati. Besikap diatu nuan, ngulu ka samoa orang Israel nyemerai Batang Jordan, lalu mansang ngagai menoa ti kena diberi Aku ka kita. Baka ti udah dipadah Aku ngagai Moses, Aku udah meri kita ti anembiak aku, samoa menoa ti kena teresa kita. Entara menoa kita, bedudok ari menoa puang di selatan nuju ngagai Bukit Lebanon di utara; ari Batang Eupratis di timor, nyengkaum semoa menoa orang Iti nyentok ka Tasik Tengah di barat. Nadai orang ulih ngalah ka kita sepemanjai umor nuan. Aku endang deka enggau nuan belama, baka aku ti udah enggau Moses, lalu enggai ngelengka tauka ninggal ka nuan.”*** (Josua 1:2-5).

Ari tampai tu bansa Israel ti diuluka ulih Josua ngerampas menoa Kanan lalu betapa dimenoa nya nitihka peneka Allah Taala. Bala kaban G-KRIS, leboh kitai bisi tampai, samangat kitai nyerarai baka api, baka slogan sedadu Iban “Agi Idup, Agi Ngelaban”; bakanya mega Josua “Agi Idup, Agi BetuaiKa Tuhan.” (Josua 24:15)

### **Tampai G-KRIS.**

**Tampai G-KRIS : GEREMPONG MISION TI REGAS NGEREMBAIKA INJIL NGENA JAKU IBAN DI SERATA DUNYA.** (*A global missionary enterprise with expertise in Iban language*).

Nitihka undang-undang G-KRIS, kitai ulih ngereja mayuh macham pengawa ti besangkut paut enggau perintah Allah Taala. Kitai ulih numbohka gerija, bebelika tauka begagaka rumah alai sembiang, ngaga sekula mision, ngaga tadika enggau utai bukai. Tang baka ke diatu, kitai deka ngemeratka pengawa nginjil ngena jaku Iban.

G-KRIS tu organisasi mision, lalu kitai deka ngaga G-KRIS nyadi pengulu enggau penginjil ti regas. Kitai milih mision laban tu pesan Jesus dalam **Matthew 28:18-20** ti deka tiap-tiap iko bala Kristen nyadi pemela di serata dunya. Gerija bepun ari mision. Enti nadai mision nadai gerija. Gerija di Sarawak enggau di Malaya ditu pen bepun ari mision ti datai ari menoa Europah kurang lebih 200 taun ti udah. Nya meh kitai meda gerija ti ngemeratka mision balat mansang lalu gerija ti nadai mision - tasal.

Destinasi kitai ukai semina mision sengapa kada tang deka nyadi gerempong ti regas dalam ministri jaku Iban. Jaku Iban udah jauh di ati ba sekeda kitai sebala diatu. Sekeda kitai udah ngelengka jaku Iban enggau bansa Iban. Nama penyalah jaku Iban, bansa Iban? Nadai. Kitai Iban setanding enggau bansa bukai, sama pandai ulih masuk Universiti, sama gap baka kumang ribai, sama dikerinduka Tuhan baka Tuhan ti udah milih bansa Judah. Kitai udah milih jaku Iban dikena ngerembaika Injil. Reti tu, G-KRIS nyadi pengulu jaku Iban dalam pengawa gerija diserata dunya; G-KRIS nyadi gerempong alai orang penganggai pasal Injil ngena jaku Iban. G-KRIS tu deka nyadi gerempong ti patih dalam jaku Iban.

### **Tuju G-KRIS.**

Kitai nadai tau berangan-angan aja, bisi tampai tang nadai tuju. Tuju ianya kar jalai (roadmap) ke tampai. Tuju G-KRIS bisi tiga iti.

Keterubah ianya **JAKU TUHAN** – **NIRIKA BALA TI RANSINGKA JAKU TUHAN TI ULIH NGUINGKA RUNDING ENGGAU PENEMU BALA TI BEJAKU IBAN NGAGAI PERINTAH ALLAH TAALA.** (*Word of God – to establish a spirit of enterprise with the Word of God to yield godly influence to the Iban speaking community*) (2 Tim 3:16).

- Tuju kitai ianya nempa bala ransingka Jaku Tuhan laban Jaku Tuhan tu pemendar. ***“Samoa Bup Kudus endang bepun ari Allah Taala, lalu ia beguna bendar kena ngajar utai ti bendar, kena mantah penyalah, ngaduka pendiau ti salah sereta ngajar pengidup ti lurus, ngambika orang ti betuaika Allah Taala tau diterima lalu nyediaka diri dalam samoa kerja ti badas (2 Tim 3:16-17).***
- Mayuh orang nangika pemendar (**Jn 8:45**) lalu tu meh kabuah pemendar mesti dipanchar diserata dunya awakka mensia digaga lurus dimoa Allah Talla. Pemendar nadai ulih dilamun enggau kerja ti nadai bebasaka Allah Taala. Lama laun pemendar deka tebantai laban dinding ti nekol pengawa Tuhan ulih diruboh ngena teknology lalu teknology makin berubah manah. Nengah teknology kitai ulih ngingka runding orang mayuh ngagai perintah Allah Taala.
- Dalam tuju tu, kitai udah dikemendarka ulih Bible Society Malaysia nyibarka Bup Kudus nengah website G-KRIS - [www.gerijaiban.com](http://www.gerijaiban.com). Website tu deka digaga makin manah. Kitai mega udah bulih kaling ba siko paderi ti udah sanggup mantu kitai minta pemendar ari Inter-Varsity Press (IVP), England nyalin Commentry English Bible ngagai komentri Bup Kudus Iban. Kitai arap pengawa tu ulih tembu dalam 10 taun ti deka datai.

- Semina pemendar aja ulih ngingka runding enggau penemu ngagai perintah Allah Taala. Nya alai kitai nadai ulih dudok diau diri, nganti tauka ngelakka pangan diri. Enti ukai nuan enggau aku, sapa agi. Enti nadai diatu – kemaya?

Tuju kedua ianya **BEGEMPONG – NGANGKATKA PEMERETI ANTARA GERIJA AWAKKA NYADI SAKSI TI BEKUASA PASAL Pengerindu Allah Taala**. (*Unity – to foster understanding among all churches as a powerful witness of God’s love*) (Jn 17:21-23; Mat 28:19-20).

- Kitai begempuru ditu lemai tu laban nya peneka Tuhan. Jesus dalam **John 17:21-23** besampi ngagai Allah Taala deka kitai seati, begempong nyadi siti dalam Iya. Gempuru G-KRIS tu digaga tiap bulan dikena mupok ati enggau sikap ti begempong antara mayuh bengkah gerija. Taun tu, tema kitai diambil ari **Epesus 4:13; Jn 17:21-23** ianya **“Begempong Nyadi Saksi Kristus.”**
- Dunya kitai tu diselapat enggau macham-macham utai. Dinding digaga diantara menoa dikena nyelapatka kaul kitai sekaban. Dinding “Great Wall of China” digaga maya Ming Dynasty dikena ngelindung empayar bansa China siti-siti ti nadai seati enggau pangan diri. Dinding “Berlin Wall” digaga dikena nyelapat German Timur enggau German Barat kategal ideology politik ti bebida.
- Kitai udah meda dinding ti nyelapat kaul mensia udah mayuh ruboh. Leboh dinding ruboh baka “Berlin Wall” ti udah ruboh kenaka 9/11/1989, kitai ulih ngasaika pengelepas, ulih bekaul serta likun enggau pangan diri. Pia mega, “The Great Wall of China” diatu udah nyadi “tourist attraction” alai orang ari seluruh dunya bekaul enggau menoa China. Kira 2000 taun ti udah, leboh **“kain ti digantung dalam Rumah Sembiang charik belah dua ari atas dataika baroh” (Mk 15:38)**, nya tanda selapat antara mensia enggau Allah Taala udah diruboh ulih Jesus Kristus.
- Taja pia, kitai agi diselapat nengah pengarap. Kitai Kristen empu diselapat enggau mayuh macham ajar ti nadai bepanggai ba Bup Kudus ngujungka kitai nadai tepeda ke tampai Tuhan ti besai.
- Kitai deka meda G-KRIS nyadi siti platfom ti ulih muai penangi ati, muka jalai bekaul antara gerija baka Jesus ti udah ngeruboh kain tirai ti nyelapat mensia enggau Allah Taala. G-KRIS dikangau nunda rasul Paul. Rasul Paul, lebih kurang 2000 taun ti udah, udah muai penyelapat antara

bansa, muka jalai ke semua bansa nyadi siti dalam Kristus. Orang Judah enggau bansa bukai siti dalam Kristus, indu enggau lelaki siti dalam Kristus. Nadai ngira ni bagi gerija, kitai udah dibaptisa nyadi siti tuboh ulih Roh Kudus siko aja. Begempong kitai teguh, bepechah kitai alah.

Tuju ketiga ianya G-KRIS deka ngaga **PEMADAS**. Reti PEMADAS ianya **“Palan Pemela Ti Badas”**, siti palan alai orang mayuh bepanggai nambahka penemu mansang dalam pengarap. Kerja **PEMADAS ianya NGAGA PERENGKA DIKENA NGAJAR SERETA NGELATIH KETUAI NGEREJA PENGAWA GERIJA**. (*Center of Excellence – to build resources and learning materials in Iban language for leadership training and church ministries.*)

- Enti kitai meda diatu, siti-siti gerija ngaga pelajar ngati kadiri empu dalam topik ti sama. Ambi ke sema, siti-siti gerija ngaga bup lagu puji & sembah, pelajar dikena ngelala Tuhan enggau utai bukai. Pengawa tu nambahka ungnos enggau jam laban dikerja beulang-ulang ulih gerija siti-siti. Tang enti kitai bisi PEMADAS, kitai ulih ngereja semua utai tu nengah jalai ngemponka pemisi; kitai ulih bejimat lalu asil enggau pangka kerja besai agi.
- Julok kitai ianya ngaga PEMADAS ti pemadu badas. Allah Taala udah meri teladan ka kitai; Iya nadai ngena buah pinang, daun sirih, jani tauka manok ka piring tang Iya meri piring ti pengabis badas, anak Iya empu Jesus Kristus ka kitai. Enggau patut mega kitai nimbal pemadas Allah Taala enggau stindid kerja ti pengabis badas, meri Iya gerempong gerija Iban ti pemadu badas.
- Dikena kitai ngepunka PEMADAS, kitai udah bisi pelajar “Pemun Ti Teguh” ti disalin ulih International Christian Mission lalu disibur ulih G-KRIS dikena belajar nyadi tuai dalam pengarap. Pia mega, kitai benong ngaga CD Cherita Tuhan (God’s Story), lalu aku arap projek tu ulih tembu enda lama agi.

### **Strategy G-KRIS.**

Kitai deka ngaga G-KRIS nyadi gerempong mision ti regas ngena jalai bekunsi enggau technology.

**Bekunsi** : Kitai deka bekunsi ngereja utai kena mansut ka asil ti besai sereta beguna nengah kerjasama enggau gerempong ti besai. (*Global Partnership – to accomplish significant results through partnership with major organizations and churches.*)

- Tuhan dalam **Pengajar 4:9** nyebut **“Orang dua iko badas agi ari siko, laban pengawa saduai tau mujor agi.”** Bala kaban G-KRIS, Jesus dataika dunya nadai ngereja pengawa kadiri aja taja meh nadai utai ti enda ulih kerja Iya. Iya milih 12 iko murid awakka bisi nyadi kaling Iya. Pia mega, Jesus milih Paul awakka semua bansa ulih ngasaika pengerindu Tuhan lalu nadai bepanggai ba rasul 12 iko aja.
- Andrew Carnage – siko rayat Amerika ti balat mujor dalam pengawa dagang nyebut jaku tu leboh iya bekungsi pasal pemujor pengidup iya - *“No single mind is complete. Two or more minds working together in harmony toward a definite objective, have more power than a single mind.”*
- Pia mega, nadai siti bengkah gerija ulih nyadi hero laban tiap-tiap iko bala Kristen sigi udah diagihka enggau penau ulih Tuhan. G-KRIS mega bisi bagi nambahka asil enggau pemanah gerija bejalaika pengawa Tuhan. G-KRIS ukai deka bepekit tauka ngalahka gerija sedia-ada, tang deka nyadi kaling ngaga pengawa gerija lebih efektif awakka bulih asil ti besai. Leboh kitai bekunsika pemisi, gerija ti mit ulih diangkat, gerija ti besai ulih mansang belipat lipat.

**Teknology : G-KRIS deka bejalaika pengawa ngena teknology pemadah (ICT) ngerembaika Jaku Tuhan, besaumka perengka kena ngelatih enggau belajar.**  
*(Technology – to utilize effective information communication technology (ICT) to spread the Word of God, for resource sharing and learning.)*

- Teknology balat amai ngingka penungga dunya ari kelua dataika saritu. Ari teknoloji, menoa Amerika ulih ngerubohka ideloji komunis di langit. Pia mega kitai udah meda, teknology ulih nyadi perengka ngingka perintah.
- Teknology makin berubah manah. Generasi baru generasi teknology. Teknology deka ngaga Kristen ti baru, gerija ti baru lalu enti kitai nadai nyediaka gerija ngena teknology diatu, generasi baru deka lenyau baka bansa ti nadai tampai.
- Teknology makin mansang di menoa kitai. Nitihka itung, orang ti ngena internet bisi 9.3 juta di Malaysia. Di Sarawak, bisi 600 ribu (6.3%) orang ngena internet. Pia mega, broadband udah tama 38% di Sarawak, KL – 90%, Selangor – 77% enggau Johore – 47%. Tu peluang ti udah dibuka

ulih Tuhan awakka mulia Iya ulih dipanchar ngagai serata dunya, nadai ngira kalika nuan diau dinegeri tauka dimenoa pesisir.

- Nengah ICT kitai nadai agi bejalai ngerentas babas beminggu-minggu, nadai agi bekayuh ngelaban arus ai sungai. Jaku Tuhan ulih dikenataika kitai serta merta ngagai bala Iban di Malaya, Sarawak, di menoa China, di Saudi Arabia enggau di serata dunya.

### **Samangat Kristenism.**

Ingat bala menyadi dalam Kristus, G-KRIS ianya gerempong mision ti regas ngerembaika Injil ngena jaku Iban di serata dunya. Gerempong tu semina ulih regas enti nuan ngambi bagi meransang bala ngembuan samangat Kristenism (Agi Idup, Agi BetuaiKa Tuhan). Destini gerempong tu ba jari kitai empu. Enti pengawa G-KRIS mujur kategal kitai. Pia mega enti pengawa tu tasal kategal kitai, ukai kategal orang bukai.

Kitai baru belaboh. Pejalai kitai agi jauh serta panjai. G-KRIS tu kangau ari Allah Taala ka aku, ka nuan enggau ka semua bansa di serata dunya. Pengawa tu nadai ulih kerja siko-dua aja; “we have to move as a team” - lebu kitai berani nyingkang Tuhan nulong kitai dalam pengurang enggau pengelemi.

Timboh udah datai alai nuan enggau aku meri diri lebih agi. Tu meh maia ia kitai nampong pengawa sida Francis Thomas McDougall kelia ngagai generasi baru. Aram kitai sama mansang enggau pengarap, iya ti kering ambika nyadi teladan, iya ti lemi kitai sukong, awakka leboh kitai datai ba adan, kitai ulih bejaku nunda jaku Paul ti munyi tu ***“Aku udah enggau naka ulih belaban dalam lumba, aku udah belanda datai ka ujung, aku udah ngintu pengarap,” 2 Tim 4:7.***

Selamat mujur serta berkat Tuhan enggau kitai selalu.

Duwen Babat  
Gempuru G-KRIS  
Full Gospel Assembly Kuala Lumpur.  
15 Januari 2011.